

# IKHWĀNUL MUSLIMĪN DAN JAMĀL ‘ABDUL NĀSR

Oleh ‘Abdullāh Basmeh

Suatu perkara yang sangat-sangat menyedihkan alam Islam pada hari ini ialah tindakan Jamāl ‘Abdul Nāsr menindas gerakan Ikhwānul Muslimīn dengan kejamnya.

Orang-orang yang mengikuti aliran siasah di Mesir akan ternampak bagaimana halobanya Jamāl ‘Abdul Nāsr hendak merebut pengaruh dan memegang tampuk pemerintahan apabila Presiden Najīb perwira pemberontakkan Mesir telah dirampas kuasanya lalu dijadikan ibarat seekor singa yang tidak berkuku dan tidak bertaring.

Setahun lamanya semenjak Jeneral Najīb dirampas kuasanya dan Jamāl melantik dirinya menjadi perdana Menteri yang berkuasa penuh atau lebih jelas menjadi diktator Mesir menurut jejak Hitler, Musolini dan Kamāl Atātürk, maka semenjak itu Jeneral Muḥammad Najīb bapa kemerdekaan Mesir, walau pun ia masih menjadi presiden tetapi namanya dan gambar-gambarnya tidak kelihatan tersiar sama-sekali di dalam akhbar-akhbar Mesir. Orang bertanya: mengapa berlaku demikian? Jawabnya: Begitulah perintah diktator Jamāl!

Semenjak itu akhbar-akhbar Mesir dikaramkan oleh pihak yang berkuasa Mesir dengan gambar-gambar dan dakyah untuk mengagung-agungkan Jamāl. Kononnya Jamāl lah yang telah menggulingkan Farouq. Bukan Najīb. Jamāl lah anu dan Jamāl lah anu yang peliknya lagu yang merdu ini tidak kedengaran melainkan sesudah Jamāl berjaya merampas kuasa – menjadi


diktator!

Dengan kedudukan yang demikian Perdana Menteri Jamāl ‘Abdul Nāsr telah berhadapan dengan musuh politiknya yang terdiri dari berbagai-bagai parti - parti Wapdi, parti Saudi, parti bebas dan lain-lainnya. Yang kesemuanya telah dimansuhkan. Lebih-lebih lagi dengan pertubuhan Ikhwān al-Muslimīn yang masih terdiri dengan gagah dan beranggotakan lima juta orang yang tidak dapat dipatahkan semangat keIslamannya.

Untuk menyingkirkan Najīb dan menghancurkan



*Sebahagian dari serambi Masjidil Harām Mekah al-Mukaramah di sinilah pintu-pintu ilmu D. Y. Merata-rata dunia duduk mengelilingi alim ulama menerima didikan Islam yang sejati.*



Baitullāh al-Ḥarām – tempat terpancar cahaya Islam ke seluruh dunia – kelihatan bermandi cahaya dengan indah.

pertubuhan Ikhwānūl Muslimīn inilah yang menyebabkan sandiwara “percubaan membunuh Jamāl” telah dilakukan dengan bijaknya oleh Jamāl dan rakan-rakannya baharu ini, dan hasil ceritanya- sebagaimana yang telah diketahui oleh dunia – Najīb telah disingkirkan dan pertubuhan Ikhwānūl Muslimīn telah dihancurkan (pada zahirnya, tetapi yang sebenarnya masih hidup ) dan sebahagian dari ketua-ketua dan angkatan telah dibunuh, dan disumbatkan ke dalam penjara.

Tindakan diktator Jamāl yang bermaharajalela ini telah membangkitkan kemarahan seluruh negara-negara Islam. Najīb telah

dibela oleh pemimpin-pemimpin Sudan yang telah mengugah akan terpecah dengan Mesir sekiranya Najīb dipengapakan atau pun dibicarakan atas sebarang tuduhan. Manakala Ikhwānūl Muslimīn yang telah dihukum telah mendapat timbang rasa dari seluruh negara-negara Islam. Bantahan telah dihantar mencurah-curah ke Mesir, perarakan-perarakan telah diadakan di Damsyik , di Oman, dan lain-lainnya. Bahkan ada yang telah betempik “ runtuhlah kerajaan Jamāl ‘Abdul Nāṣir!”

Bantahan-bantahan dari Pakistan dan Indonesia telah dihantar tunda menunda bahkan seluruh masjid-masjid jamek di Jakarta dan lain-lain kota lagi telah mengadakan sembahyang ghaib kepada arwah Ikhwānūl Muslimīn yang telah menjadi korban kekejaman itu.